

Sin descarta cualkier otro posibilidad

Elio Nicolaas ta warda speranza cu Natalee ta na Bida



ORANJESTAD (AAN) — Señor Elio Nicolaas ta kere cu si Natalee Halloween no ta na Aruba mas e ta na otro caminda, pero e no ta pensa cu el a worde mata. E ta sinti cu e hoben ta na bida aunke si esaki no resulta asina e por

worde tuma pa “estupido”, segun su declaracion duna na DIARIO.

Señor Nicolaas a señala cu tin hopi pregunta cu mester bin na claridad ainda, locual e mes a bisa na un ruman homber di e mama di

Natalee. Segun ‘e, e investigacion mester a cuminsa cerca e studentenan cu a bin hunto cune, na e lugar unda e mucha muher ta biba na Alabama, y tambe cerca famia y e chaperonnan. Nicolaas a agrega cu den diferente ocasion el a referi na e test “detector di mentira” cual na Aruba legalmente no ta acepta, pero el a worde usa den pasado den un caso unda e mes tabata den e investigacion y esaki a yuda hopi pa soluciona e caso den tempo corto. Den e caso di Holloway tambe e por a yuda, segun Nicolaas.

Tambe e ta puntra su mes ki sorto di poder e famia aki tin cu a capta tanto interes di prensa internacional, y e ta

lamentar cu Aruba a haya un mal imagen door di esaki.

Na su opinion, gobierno mester cuminsa haci un nota di tur loke ta worde bisa, pasobra si ta bin resulta cu e mucha muher aki ta na bida y cu e mes tin algo di haber den e situacion, y peor ainda si e mama sa mas cos, aunke podise e no ta envolvi, pero cu por di haber cu un seguro of algo asina.

Sr. Nicolaas a laga sa cu e tin informacion cu tin cosnan cu e mama no kier bisa publicamente ni na e medionan di prensa internacional ni na polis di Aruba, pero tin hopi indicacion cu e mama sa mas.

Elio Nicolaas a subraya cu no mester descarta ningun

posibilidad, ya cu e ta mira cu tur hende a bay riba un posicion so. Ademas el a cuestiona e hecho cu e mama di Natalee no ta actua manera un mama cu su yiu a muri, pero mas bien riba un mama cu ta spera cu su yiu bin cas. Nicolaas ta haya cu tin diferente indicio cu e mucha muher mes a laga atras skirbi, manera un cantica, cu ta mostra cu e no tabata feliz, y kizas awor e ta gozando di su libertad na otro caminda hunto cu e hende(nan) cu ta apoye.

Tampoco e ta kima man pa ningun hende y e hecho cu e tres hobennan concerni tabata den compania di Natalee y a wak’e na ultimo, por tin algo di haber pero tambe nan por ta inocente tambe. En todo caso no ta asina tampoco cu Aruba mester haci manera Merca ta kere cu nos por haci, pasobra esaki no ta Guantanamo, y nan no por kere cu loke nan ta haci na Merca nos por haci na Aruba.

Cu otro palabra sr. Nicolaas a presenta situacionnan cu mester worde determina for di e investigacionnan.

E ta haya cu e situacion aki ta malo pa Aruba, pero di otro banda cu Aruba a haci tur su esfuerzo pa resolve e caso. Cu enfasis el a comenta cu si ta bin resulta cu e mama sa cosnan cu e no kier declara, gobierno mester cuminsa pensa riba un caso legal contra e dañonan y perhuicionan cu e asunto aki ta ocasionando Aruba.

Pero si resulta despues cu algo malo a pasa cu e mucha muher pa Aruba e lo ta grave, pero no pa Merca unda cosnan mucho mas grandi ta sosode, y su pregunta ta keda pakico tanto interes di Merca riba e caso Holloway.

Tambe el a compara e periodista Mericano Nancy Grace cu la Malandra di Venezuela (Cuanto vale el show) pa e sistema con e ta hunga e rol, pero segun’e asina e ta bende su programa.

**TELEFONNAN
DI DIARIO
582-6747
FAX
582-8551**